



Selasa, 03 Desember 2024

Ogen: Maleaki 3:5



"Tuhan Ngadili"



Ibas masa genduari enda tempa-tempa kalak lanai lit melana. Perbahanen-perbahanen si la mehuli mbue ipertontonken bas media sosial janah ndatken viewer si meganjang. Lanai kalak mela pamer erta-erta ntah pe barang-barang mewah tapi kedungenna eteh maka ia korupsi milyar-milyar arah sen rakyat. Nggeluh glamor tapi situhuna e ulih jadi simpanan kalak, pelakor ntah pe jadi simpanan kalak si lit duitna. Sope langa marak teknologi informasi enda, kalak erbahan dosa erbuni-buni, tapi genduari dosa kai pe lanai ibuniken. Tapi seri nge upahna buniken ras lang. Sabap Tuhan ngidahsa kai kerina si ibahan manusia i bas geluhna.

Kitab Maleakhi 3:5 nuduhken sada nubuatan si enggo ras si tetap idalanken Tuhan i bas keadilenna. Maka reh nge pagi IA, lako ngadili. Kata *reh* i jenda situhuna merujuk ku bas kehadiran Tuhan Jesus. IA reh pagi guna nehken hukum si mbaru kerna keadilan Tuhan. Lang situhuna Tuhan tetap nge lit i tengah-tengah bangsa e, saja bangsa Israel e lanai igejabkenna, dingen erkiteken la iakapna Tuhan e erpengidah perbahan.enna, mbue i tengah-tengahna jadi perbahanen-perbahanen jahat. Ersembah man dibata-dibata sideban arah guru-guru pertendung, erlua-lua, ersaksi palsu, nipu kalak upahen, nindas diberu balu-balu, anak melumang ras kalak pertandang. Situhuna bangsa Israel idilo gelah jadi teladan, melindungi si lemah, jadi simaba dame ras kesaksin kerna kiniulin Tuhan.

Geluhta kap pe situhuna idilo guna banci jadi usihen, i bas ngepkep si lemah, nehken kedamen, jadi saksi kegeluhen situhu-tuhu erkemalangen man Tuhan. Tapi amin gia kita erkubang bas dosa, adi litlah kita ngaku jera, lit pengalemi dosa bas Tuhan. Janji Tuhan ngalemi kita, adi kita ngaku dingan jera. Nggeluh ka ngulih i bas kegeluhen si mbaru.